



USAID
HUSI POVU AMERIKANU



Kolokasaun Ofisial Polisia Suku no Dezafiu Sira

Mahein Nia Lian Nú. 101, 30 Jullu 2015



Foto: PNTL

Relatoriu Fundasaun Mahein Nia Lian ne'e suporta husi povu Amerikanu liu husi Ajénsia Estadus Unidus ba Dezenvolvimentu Internasional (USAID)

Vizaun husi autor sira ne'ebé expresa iha publikasaun relatoriu sira ne'e la reprezenta vizaun husi Ajénsia Estadus Unidus ba Dezenvolvimentu Internasional (USAID)

Fundasaun Mahein (FM)

Website: www.fundasaunmahein.org

2015

Kontiudu sira

Kontiudu sira	2
Introdusaun	3
Metodolojia	4
Importansia OPS iha suku	4
Kolokasaun no funsionamentu OPS	5
Mudansa no preokupasaun sira	10
Rekomendasaun	11
Bibliografia	13

Introdusaun

Polisiamentu Komunitaria nu'udar filozofia Polisia Nasiona Timor-Leste (PNTL) nian no hatur ona iha iha Dekretu - Lei Nú. 09/2009, Loron 18 fulan Feveireiru, Lei Organika PNTL. Artigu 1, númeru 2, hatete tuir estratéjia no filozofia polisiamentu nian PNTL iha karakterístika polisia komunitária, maske nia organizasaun, dixiplina, instrusaun no estatutu pesoál nian sei tuir natureza militár, PNTL sei la konstitui forsa natureza militár ida.¹

Nune'e iha tinan 2014 PNTL pasa ona Planu Estratejiku 2014 – 2018 ho nia modelu polisiamentu hakoak filozofia polisiamentu komunitariu, liu husi adopta doutrina VIP – Vizibilidade, Involvementu no Profesionalismu.²

Vizibilidades, hatudu presenza polisia nian liu husi atividades polisial iha comunidade nia leet iha fatin hotu-hotu, hodi nune'e comunidade sente seguru no hakmatek. *Involvementu*, involmentu comunidade nian iha lala'ok siguransa hodi nune'e eduka ona comunidade sai mos na'in ba asaun sira siguransa. Nune'e siguransa la'os responsabilidade PNTL nian deit, maibe responsabilidade ema hotu-hotu nian hodi asegura espirtu parseriadu ne'ebe forte liutan. *Profesionalismu*, hatudu matenek iha ita nia atuasaun no atendentu, nakonu ho disiplina hatene lori-an no tau-an iha comunidade nia leet. Nomós respeita hirarkia Komandu nian, hodi asegura integridade, kredibilidade no prestiju instituisaun PNTL.³

Ofisial Polisia Suku (OPS) hanesan elementu prinsipal husi Planu Estratejiku PNTL nian no implementador atividade estratejiku polisiamentu komunitaria Timor-Leste. Ho nia objetivu aumenta vizibilidade PNTL nian iha comunidade, estabelese parseria metin liutan ho lider komunitaria no autoridade relevante seluk no harii konfiansa comunidade nian ba PNTL iha asaun sira siguransa nian.⁴

Iha tinan 2013 Komandu Jeral PNTL hahu ona koloka ona OPS ba suku⁵ no tuir orientasaun Komandu Jeral PNTL nian to'o tinan 2015 nia rohan OPS koloka ona iha suk 442 iha teritoriu tomak.⁶ Portantu comunidade nia ejiensia vizibilidade polisia nia sei menus, dalabarak sira la hetan atendentu husi polisia tanba dook husi sira.⁷

¹ Dekretu - Lei Nú. 09/2009, Loron 18 fulan Feveireiru. LEI ORGANIKA POLÍZIA NASIONAL TIMOR-LESTE (PNTL). Artigu 1, númeru 2.

² Planu Estratejiku PNTL tinan 2014 – 2018.

³ Hanesan deskreve iha footnote 2.

⁴ Polisia Nasional Timor-Leste. Modelu Polisiamentu Komunitaria Timor-Leste: Vizibilidade, Involvementu no Profesionalismu (VIP). Tinan 2015.

⁵ Relatoriu *The Asia Foundation* (TAF), tinan 2014.

⁶ Kolokasaun OPS. Disponivel iha: <http://www.pntl.tl/2014/09/24/komisariu-longuinhos-optimista-2015-polisia-prezensa-iha-suku-442/>. Asesu iha loron 15 fulan Juñu tinan 2015.

⁷ Enkontru Fundasaun Mahein (FM) ho lider komunitaria, PNTL Munisipiu no OPS liu programa *Community Management Meeting* (CMM) iha Munisipiu Aileu, Bobonaro, Covalima, Manatuto no Rejiaun Oe-cusse iha tinan 2014 no 2015.

Relatoriu ne'e deskreve espesifikamente kona-bá kolokasaun no nia funksionamentu OPS iha suku ka atividade sira no kondisaun báziku ho dezafiu sira iha serbisu OPS nian.

Metodolojia

Referensia prinsipal sira ne'ebé konsidera iha peskiza ida ne'e liu husi revizaun ba literatura ka relatoriu dahuluk sira hanesan Lei Organika PNTL nian, Planu Estratejiku PNTL 2014-2018, Modelu Polisiamentu Komunitaria Timor-Leste no relatoriu sira husi organizasaun nasional no internasional sira hanesan *The Asia Foundation* (TAF).

Halo mos entrevista ka enkontru ho entidade prinsipal sira iha munisipiu no nasional. Liu-liu elementu xave sira hanesan lider komunitaria, OPS, Komandante PNTL Munisipiu sira no Departamentu Polisia Komunitaria Nasional. Inklui relatoriu no apresentasaun sira iha eventu nasional sira polisiamentu komunitaria nian.

Konklui iha relatoriu ne'e liu husi diskusaun ne'ebé Fundasaun Mahein (FM) adopta ho naran *Security Sector Discussion* (SSD) ne'ebé involve peskizador sira husi FM rasik.

Importansia OPS iha suku

Adopta tiha ona iha filozofia PNTL nian polisiamentu komunitaria no nia doutrina VIP. Nune'e prezensa OPS nian iha suku liu husi atividades polísial iha comunidade nia leet iha fatin hotu-hotu sente seguru no hakmatek. Ho involve comunidade iha lala'ok siguransa hodi nune'e eduka ona comunidade sai mos na'in ba asaun sira siguransa hodi asegura espiritu parseriadu ne'ebé forte.⁸

Portantu depois krize tinan 2006 comunidade sira hare katak PNTL monu tiha ona ba krize no lakon konfiansa ba autoridade responsavel siguransa nian. Tinan 2013 *The Asia Foundation* (TAF) nia levantamentu, respondente liu metade hato'o katak sira lamenta oituan ka lamenta tebes-tebes kona-bá inseguransa iha sira nia hela fatin. Número ida ne'e tun oituan kompara ho levantamentu tinan 2008 ne'ebé liu tiha tinan rua krize 2006.⁹

Iha sorin seluk, relatoriu levantamentu TAF nian tinan 2013 nian mos hato'o maioria comunidade asesu ba informasaun siguransa barak liu husi televizaun no menus liu husi PNTL. Nune'e mos asesu informasaun siguransa barak liu husi nasional duke husi lokal. Nune'e afeta ba comunidade sira hodi bela komprende situasaun siguransa iha área ne'ebé sira hela ba no hodi identifika resposta apropiadu wainhira krime ida akontese.¹⁰

Nune'e mos responsabilidade ba siguransa indika autor oin-oin fo siguransa no protesaun iha nivel suku. Maske nune'e número vitima husi krime ne'ebé ninia resposta

⁸ Planu Estratejiku PNTL 2014-2018.

⁹ *The Asia Foundation* (TAF). Survey 2013 Iha Timor-Leste Kona-bá Asuntu Seguransa no Polítika.

¹⁰ Hanesan deskreve iha footnote 9.

dahuluk atu buka assistensia PNTL nian aas liu oituan deit duke númeru ne'ebé hakbesik ba xefe suku ka xefe aldeia ba krime hotu-hotu.¹¹

Hakat husi krize tinan 2006 konsolidasaun ba instituisaun PNTL hodi asume responsabilidade siguransa ho Nasoens Unidades nia tulun. Iha nivel konfiansa ne'ebé aas ba PNTL maibe kontaktu ho PNTL limitadu no sai dezafiu ida ne'ebé seriu. Maske nune'e, PNTL konsidera katak komunidadade hanesan parseiru iha kombate krime. Maioria membru PNTL reklama katak sira hetan ona treinamentu polisiamentu komunitaria no aplika prinsípiu polisiamentu komunitaria iha sira nia serbisu. Maibe la iha klareza kona-bá oinsa atu aplika prinsípiu sira ne'e iha atuasaun.¹²

Husi levantamentu ida ne'e, enkontru ka sorumutu sira ne'ebé FM halo ho xefe suku, juventude, PNTL no autoridade relevante seluk iha munisípiu no suku. Hotu-hotu hato'o preokupasaun hanesan kona-bá konflitu no krime ne'ebé akontese iha suku kontinua sai hanesan preokupasaun prinsipal. Númeru ne'ebé aas liu violensia domestika no disputa rai. Husi númeru ida ne'e, tuir kedas ho kazu asalta malu entre individu no grupu sira.

Nune'e eijjensia lider komunitaria sira kona-bá prezensa PNTL iha suku tanba polisia dook husi komunidadade no dalaruma susar atu kontaktu. Enkuantu kazu balu komunidadade sira rezolve rasik ho dalan violensia.¹³

Kolokasaun no funsionamentu OPS

OPS hanesan membru PNTL ida ne'ebé maka hetan ona treinamentu husi Departamentu Polisia Komunitaria Nasional kona-bá treinamentu baziku, re-treinamentu no treinamentu avansadu, treinamentu espesífiku no hotu-hotu sertifika ona husi treinamentu hirak ne'e.¹⁴

OPS ne'ebé koloka iha suku hetan nomeasaun husi Komandante PNTL munisípiu nian. Ho nia rekezitu OPS ne'ebé iha suku ho nia diviza minimu Ajente Xefe no masimu Premeiru Sarjentu. Maske nune'e tuir FM nia monitorizasaun maioria OPS ne'ebé koloka iha suku ho diviza Ajente no Ajente Prinsipal.

Kolokasaun ba OPS iha suku la hare ba mane ka feto no hotu-hotu la iha terminasaun ba idade.¹⁵ Maske membru PNTL hamutuk 200 inklui OPS balu pasa tiha ona ba idade

¹¹ Hanesan deskreve iha footnote 9.

¹² Hanesan deskreve iha footnote 9.

¹³ Enkontru Fundasaun Mahein (FM) ho lider komunitaria, PNTL Munisípiu no OPS liu programa Community Management Meeting (CMM) iha Munisípiu Aileu, Bobonaro, Covalima, Manatuto no Rejiaun Oe-cusse iha tinan 2014 no 2015.

¹⁴ Polisia Nasional Timor-Leste. Modelu Polisiamentu Komunitaria Timor-Leste: Vizibilidade, Involvimentu no Profesionalismu (VIP). Tinan 2015.


¹⁵ Hanesan deskreve iha footnote 14.

reforma maibe iha difikuldade kona-bá lei reforma nian no lei sira seluk hanesan lei siguransa sosial.¹⁶

1. OPS koloka ona iha ne'ebé?

Atu hasa'e vizibilidade polisia nian iha komidade nia leet to'o Maiu 2015, PNTL koloka ona OPS iha suku 410 husi total suku 442 iha munisipiu 12 no Rejiaun Oe-cusse. Signifika sei hela suku 32 seidak koloka OPS. Nune'e mapa iha kraik ne'e indika kona-bá número OPS ne'ebé koloka iha munisipiu 12 no iha rejiaun Oe-cusse.

Mapa 01. Kolokasaun OPS iha Timor-Leste



Fontes: Departamentu Polisia Komunitaria Nasional, Maiu 2015.

Mapa iha leten hatudu pontu jeral kona-bá kolokasaun OPS no seluk husi munisipiu no rejiaun Oe-cusse ne'ebé hatudu iha leten balu seidak koloka. Nune'e tuir orientasaun Komandu Jeral PNTL to'o tinan rohan 2015 sei kobre iha suku hotu-hotu iha munisipiu sira no rejiaun Oe-cusse.¹⁷

Husi mapa ne'ebé iha leten indika mos iha tabela kraik ne'e no deskreve kona-bá detallu sira kolokasaun OPS no número ne'ebé seidak kompleta.

¹⁶ Reforma ba membru PNTL. Disponivel iha: <http://www.pntl.tl/wp-content/uploads/kalins-pdf/singles/reforma-membru-pntl.pdf>. Asesu iha loraon 15 Jullu tinan 2015.

¹⁷ Media Timor Post, 03 Jullu 2015.

Tabela 01. OPS iha suku sira Timor-Leste nian

Munisipiu	Total Suku	OPS ne'ebé koloka ona	Suku ne'ebé seidak koloka OPS
Aileu	31	31	-
Ainaro	21	21	-
Baucau	59	49	10
Bobonaro	50	28	22
Covalima	30	30	-
Dili	31	31	-
Ermera	52	52	-
Lautem	34	34	-
Likisa	23	23	-
Manatuto	28	28	-
Manufahi	29	29	-
Oe-cusse	18	18	-
Viqueque	35	35	-
Total	442	410	32

Fontes: Departamentu Polisia Komunitaria Nasional, Maiu 2015.

Enkuantu atividade OPS nian maka tuir mai ne'e:

- a. Halo vizita husi uma ba uma
 - b. Halo reuniaun ho líder komunitaria
 - c. Halo edukasaun ba comunidade ba lalaok prevensaun krime.
 - d. Halo atendementu ba problema
 - e. Vizita grupu vulniravel sira (alizadus no orfonatu)
 - f. Reuniaun ho membru Konsellu Polisiamentu Komunitaria (KPK)
 - g. Halo mos vizita ba eskola (ba fatin ne'ebé Oficial Polisia Eskola seidak eziste)
 - h. Foti dadus hotu husi suku ninian (jeografiku, demografiku, organizasaun ne'ebé existe iha suku hanesan arte marsiais, organizasaun polítiku, líder influensiadu, kondisaun sosial no ekonomiku).¹⁸
2. Treinamentu no formasaun

To'o inisiu tinan 2015 Ofisial Polisia Suku (OPS) hamutuk na'in 442 (atus hat hatnulu resin rua) husi munisipiu 12 no rejaun Oe-cusse tuir treinamentu avansadu kona-bá kna'ar OPS hodi vizita tama uma sai uma hodi sosializa lei violénsia doméstika, kuiñesimentu kona-bá droga, alkóliku nomos oinsa halo investigasaun báziku ba problema ruma ne'ebé akontese iha terrenu. Treinamentu ne'e nu'udar kooperasaun ho Polisia Nova Zelandia liu husi *Timor-Leste Community Police Programme* (TLCPP),

¹⁸ Polisia Nasional Timor-Leste. Modelu Polisiamentu Komunitaria Timor-Leste: Vizibilidade, Involvementu no Profesionalismu (VIP). Tinan 2015.

Fundasaun Ázia liu husi Programa HAKOHAK no ONG PRADET.¹⁹

Treinamentu ne'e hala'o durante fulan haat (4) nia laran, hahú husi loran 9 Setembru 2014 to'o fulan Janeiru 2015. Husi total OPS 442 kada semana partisipante hamutuk na'in 40 (hatnolu) husi munisipiu 3 (tolu) maka partisipa. Re-treinamentu ne'e hala'o bazeia ba rezultadu *post test* husi treinamentu báziku ne'ebé hala'o iha 2013 ho objetivu treinamentu ne'e maka atu eleva kapasidade OPS, nune'e bele hetan ona qualidade OPS nu'udar ajente ne'ebé primeira liña iha sistema operasaun polísial nian.²⁰

Husi formasaun sira iha rai laran, hala'o mos formasaun seluk iha rai liur liu husi estudu komparativu iha rai liur. To'o tinan 2014, membru OPS na'in 30 hala'o estudu komparativu iha Bekasi – Indonezia. Depois loran neen iha Bekasi, ekipa aranka mai Bali ba programa kuiñesementu polisia turizmu. Programa kapasitasaun ba membru OPS sira ne'e tamba hetan kooperasaun entre PNTL ho Polisia Nasionál Japaun nian, liu husi ajénsia *Japaun Internasionál Cooperation Agency* (JICA) iha Timor-Leste. Hasa'e kapasitasaun ne'e atu kumpri programa kooperasaun entre PNTL ho POLRI, iha área dezvoltamentu polisia Timor-Leste.²¹

Iha tinan 2012 polisia komunitaria na'in lima hala'o estudu komparativu iha Ichikawa Perfektore - Japaun, kona-bá OPS nian. Membru polisia komunitaria na'in lima ne'e kompostu husi Komandante Polisia Komunitaria Munisipiu Viqueque, Xefe Polisia Komunitaria Munisipiu Lautem, Xefe Polisia Komunitaria Munisipiu Bobonaro, Membru Polisia Komunitaria Nasionál, no Adjuntu Xefe Polisia Komunitaria Nasionál.²²

Polisia komunitaria hala'o mos estudu komparativu iha Nova Zelandia desde tinan 2013 to'o tinan 2014. Estudu komparativu ne'e nu'udar kooperasan entre Governu Timor-Leste ho Nova Zelandia liu husi Programa TLCPP ne'ebé hare liu ba dezvoltamentu polisia komunitaria Timor Leste. Estudu komparativu ne'e aprende kona-bá sistema polisiamentu Nova Zelandia, Monitorizasaun no Evaluasaun, treinamentu ba media, kodigu konduta, inteljiensia, responde comunidade Maori, planu dezvoltamentu rekursu umanu, planu estrajejiku polisiamentu, informasaun no teknolojia no programa polisia pasifiku ba violensia domestika.²³

3. Fasilidade no ekipamentu

¹⁹ PNTL. Disponivel iha: <http://www.pntl.tl/2014/09/15/membru-ops-442-tuir-treinamentu-avansadu/>. Asesu iha loran 30 fulan Juñu tinan 2015.

²⁰ Hanesan deskreve iha footnote 19.

²¹ PNTL. Disponivel iha: <http://www.pntl.tl/2014/11/14/membru-ops-30-hasae-koinesementu-iha-indonezia/>. Asesu iha loran 30 fulan Juñu tinan 2015.

²² Media The Dili Weekly. Disponivel iha: <http://www.thediliweekly.com/45-notisia/news/1854-five-community-police-officers-on-an-exchange-program-in-japan>. Asesu iha loran 20 fulan Juñu tinan 2015.

²³ PNTL – Departamentu Polisia Komunitaria Nasionál. Relatoriu Estudu Komparativu iha Nova Zelandia tinan 2013 no 2014 nian.

Iha sorumutu sira FM halo ho OPS iha suku no Komandu PNTL Munisipiu sira hotu-hotu hato'o preokupasaun hanesan. Kondisaun ba OPS sira hanesan transporte, radiu komunikaun, hela fatin sai hanesan dezafiu ba sira durante hala'o serbisu iha suku.

a. Númeru OPS no hela fatin

To'o iha tinan 2015 nia klaran OPS sira koloka ona iha suku tuir númeru ne'ebé hatudu iha tabela 01 maibe hela fatin la iha. Nune'e mos OPS ida hela iha suku seluk ka nia suku rasik ba halo serbisu iha suku seluk.

Portantu OPS sira mai husi suku ne'ebé diferente no dook husi suku ne'ebé OPS sira koloka ba. Komunitade sira kestiona OPS sira nia serbisu, dalaruma problema ida akontese atendentu OPS nian tarde liu, tan OPS la hela iha suku.

OPS sira mos halo dupla serbisu OPS nian iha suku rua ka tolu tan númeru polisia la to'o hodi kompleta suku seluk. Ho ida ne'e OPS sira dalaruma susar atu atende pedidu ruma husi komunitade ka lider komunitaira wainhira prezisa OPS nia prezensa ka atende problema ruma iha tempu ne'ebé hanesan. OPS sira mos hato'o katak la'os deit halo serbisu nu'udar OPS iha suku maibe atende mos serbisu seluk iha eskuadra tanba númeru polisia la to'o. OPS sira mos dalaruma reforsa eskuadra hodi halo atendentu ba problema ruma iha suku seluk.²⁴

b. Transporte no komunikaun

Apoiun alternativu ka nesesariu ida, ba dadaun ne'e Governu ho PNTL fasilita dadauk motorizada ba OPS sira iha suku. Maske nune'e la'os OPS hotu-hotu hetan apoiun ne'e maibe sei kompleta iha tinan tuir mai. Nune'e OPS balu sei utiliza motorizada privadu ho atesta konvustivel rasik.

Tabela kraik ne'e hatudu kona-bá motorizada ne'ebé apoiun ona ba OPS sira iha munisipiu 12 no Rejiaun Oe-cusse.

Tabela 02. Distribuisaun motorizada ba OPS sira

Naran Munisipiu	Total Suku	Total OPS	OPS ne'ebé apoiun ona Motorizada	OPS ne'ebé seidaun apoiun Motorizada
Aileu	31	31	8	23
Ainaro	21	21	21	-
Baucau	59	49	12	37
Bobonaro	50	28	8	20
Covalima	30	30	8	22
Dili	31	31	9	22
Ermera	52	52	8	44

²⁴ Enkontru Fundasaun Mahein (FM) ho lider komunitaria, PNTL Munisipiu no OPS liu programa Community Management Meeting (CMM) iha Munisipiu Aileu, Bobonaro, Covalima, Manatuto no Rejiaun Oe-cusse iha tinan 2014 no 2015.

Lautem	34	34	9	25
Likisa	23	23	8	15
Manatuto	28	28	8	20
Manufahi	29	29	9	20
Oe-Cusse	18	18	6	12
Viqueque	35	35	8	27
Total	442	410	123	287

Fontes: Departamentu Polisia Komunitaria Nasional, Maiu 2015.

Husi total suku 442, OPS koloka ona iha suku 410 no suku 32 maka seidak koloka. Husi númeru OPS 410 ne'ebé koloka ona iha suku, OPS 123 maka hetan ona motorizada no 287 maka seidak hetan. Husi munisipiu sira ne'ebé iha, Ainaro kompleta ona motorizada 21 ba OPS sira husi total suku 21. Menus liu Baucau apoiu ona motorizada 12 ba OPS ne'ebé koloka ona iha suku 49 husi total suku 59 no Ermera apoiu ona motorizada 8 ba OPS sira ne'ebé koloka ona iha suku 52 husi total suku tomak.

OPS sira ne'ebé seidak hetan apoiu motorizada ba dadaun ne'e tuir FM nia monitorizasaun konfirma katak sei utiliza motorizada privadu ho atesta konvustivel ho osan rasik. Portantu Komandu PNTL la ense konvustivel ba motorizada privadu sira.²⁵

Preokupasaun seluk, falta radiu komunikaun no dalabarak OPS sira utiliza deit telemóvel privadu ho karega kartaun ho osan rasik mos. Maske nune'e la signifika Komandu PNTL la apoiu radiu komunikaun ba membru PNTL sira ka OPS maibe radiu hirak ne'e avaria hotu ona no la halo manutensaun.²⁶

Difikuldade hirak ne'e dalabarak difikulta OPS sira, iha tempu hanesan OPS hela iha suku ne'ebé diferente ka hela dook, halo serbisu dupla, menus transporte no radiu komunikaun. Nune'e susar mos komunika ho líder komunitaria no comunidade en-geral, susar mos halo atendentu ba pedidu no insidenti ruma ne'ebé akontese iha comunidade.²⁷

Mudansa no preokupasaun sira

1. Mudansa ka susesu

Mudansa sira ne'ebé akontese PNTL reklama aumenta konfiansa, hametin relasaun no parseria ho comunidade. Mudansa sira ne'e hatudu relatoriu kona-bá krime ba PNTL,

²⁵ Enkontru Fundasaun Mahein (FM) ho lider komunitaria, PNTL Munisipiu no OPS liu programa Community Management Meeting (CMM) iha Munisipiu Aileu, Bobonaro, Covalima, Manatuto no Rejiaun Oe-cusse iha tinan 2014 no 2015.

²⁶ Hanesan deskreve iha footnote 25.

²⁷ Hanesan deskreve iha footnote 25.

hamenus violensia domestika, prevensaun ba konfliktu sira liga ho rai no plantasaun no diminuisaun ba krime jeral no trauma estrada iha tempu naruk.²⁸

Indikador ba mudansa hirak ne'e relata partisipasaun ka involvimentu komidade nian iha asaun sira siguransa nian no vizibilidade PNTL nian iha komidade. Maske durante ne'e komidade reklama kona-bá vizibilidade PNTL nian dook husi komidade.²⁹

Iha sorin seluk, problema sira iha komidade identifikadu liu husi enkontru regular OPS ho lider komunitaria, komidade no membru Konsellu Polisiamentu Komunitaria (KPK). Ho identifikasaun ba problema sira iha komidade liu husi metodu PARA (Peskiza, Analiza, Responde no Avaliasaun) halo kedas medida imediatu prevensaun, mediasaun no rezolve tuir pratika lokal (kultural) ba kazu sivil sira.³⁰

Maske nune'e, la iha toleransia ba kazu krime públiku hanesan violensia domestika. Enkuantu identifika no simu keixa kazu violensia domestika hola kedas medida prosesual tuir lei ne'ebé vigora.³¹

2. Preokupasaun

Hanesan relata tiha ona iha sesaun dahuluk relatoriu ida ne'e nian kona-bá importansia OPS koloka iha suku no dadaun ne'e koloka ona tuir ejijensia ne'ebé hato'o husi komidade no lider komunitaria sira. Ho ambisaun ida katak "polisia ida suku ida" maibe sei menus número polisia. Enkuantu iha Eskudra Cailaco Munisipiu Bobonaro membru PNTL inklui Komandante Eskuadra hamutuk na'in 8 no suku ne'ebé iha postu administrativu ne'e rasik hamutuk 8. Nune'e membru PNTL Eskuadra Cailaco reklama katak enkuantu koloka hotu membru ba OPS, eskuadra sei mamuk tanba número PNTL la to'o.³²

Preokupasaun seluk OPS sira reklama mos kona-bá *Fundu Izoladu*, enkuantu dadaun ne'e aplika ba unidade polisial sira iha PNTL hanesan Unidade Patrullamentu Fronteira (UPF). Portantu OPS balu koloka iha suku ne'ebé izoladu liu kompara membru UPF sira ne'ebé koloka iha postu vila hanesan Mota-Ain - Batugade no Aero Portu Prezidenti Nicolau Lobato, Dili.³³

Rekomendasaun

²⁸ Apresentasaun Relatoriu husi Xefe Departamentu Polisia Komunitaria Nasional, Superintendenti Asistente Polisia Boavida Ribeiro iha enkontru Konsellu Jestaun Programa Polisiamentu Komunitaria iha Kuartel Jeral PNTL, Maiu tinan 2015.

²⁹ Hanesan deskreve iha footnote 28.

³⁰ Hanesan deskreve iha footnote 28.

³¹ Hanesan deskreve iha footnote 28.

³² Adjuntu Komandante Eskudra Cailaco hato'o iha Community Management Meeting (CMM), iha Munisipiu Bobonaro. Loron 20 fulan Feveireu tinan 2015.

³³ Enkontru Fundasaun Mahein (FM) ho lider komunitaria, PNTL Munisipiu no OPS liu programa Community Management Meeting (CMM) iha Munisipiu Aileu, Bobonaro, Covalima, Manatuto no Rejaun Oe-cusse iha tinan 2014 no 2015.

Vizibilidade polisia nian iha comunidade sai ativu ona no marka ona katak to'o tinan klaran 2015 OPS koloka ona suku 410 no suku 32 seidak kobre maske preparasaun ka treinamentu ba OPS sira kompletu ona ba suku 442. Nune'e mos menus husi metade OPS ne'ebé koloka iha suku hetan ona apoiu motorizada. Enkunatu sei falta radiu komunikasaun, menus númeru PNTL iha munisipiu no preokupasaun boot liu maka hela fatin ba OPS sira.

Tanba ne'e FM rekomenda:

1. Parlamentu Nasional presiza apoiu política no fiskalizaun ba serbisu OPS nian iha suku. Enkuantu preokupasaun barak kona-bá funksionamentu OPS maibe seidak hetan atensaun diak ba nesesidade sira OPS nian hanesan hela fatin, radiu komunikasaun no transporte. Iha ne'ebé durante ne'e Parlamentu Nasional rasik preokupa kona-bá prezensa polisia nian iha comunidade nia leet.
2. Governu presiza hatur iha liña orientasaun no implementasaun ba polisiamentu komunitaria partikularmente ba OPS iha planu annual no orsamentu nian hodi atinji vizaun sira iha Planu Estratejiku Dezenvolvimentu Nasional (PEDN) 2030, Planu Estratejiku Siguransa Interna 2030.
3. PNTL presiza iha seriedade ba implementasau Planu Estratejiku PNTL 2014 – 2018. Hodi responde asaun husi komponenti prinsipal iha planu estraretejiku PNTL nian polisiamentu komunitaria nia doutrina VIP.

Bibliografia

Dokumentu:

Dekretu Lei Nú. 09/2009, Loron 18 fulan Fevereiru. LEI ORGANIKA POLÍCIA NASIONAL TIMOR-LESTE (PNTL).

Planu Estratejiku Dezenvolvimentu Nasional (PEDN) 2030.

Planu Estratejiku PNTL tinan 2014 – 2018.

Planu Estratejiku Siguransa Interna 2030.

Polisia Nasional Timor-Leste. Modelu Polisiamentu Komunitaria Timor-Leste: *Vizibilidade, Involvimentu no Profesionalismu (VIP)*. Tinan 2015.

Relatoriu Estudu Komparativu iha Nova Zelandia tinan 2013 no 2014 nian. Departamentu Polisia Komunitaria Nasional.

Relatoriu The Asia Foundation (TAF). Survey 2013 Iha Timor-Leste Kona-bá Asuntu Seguransa no Polítika.

Relatoriu *The Asia Foundation (TAF)*, tinan 2014.

Enkontru no entrevista

Enkontru Fundasaun Mahein (FM) ho lider komunitaria, PNTL Munisipiu no OPS liu programa Community Management Meeting (CMM) iha Munisipiu Aileu, Bobonaro, Covalima, Manatuto no Rejiaun Oe-cusse iha tinan 2014 no 2015.

Intervensaun Xefe Departamentu Polisia Komunitaria Nasional, Superintendenti Asistente Polisia Boavida Ribeiro iha enkontru Konsellu Jestaun Programa Polisiamentu Komunitaria, iha Kuartel Jeral PNTL tinan 2015.

Media no publikasaun seluk

Kolokasaun OPS. Disponivel iha: <http://www.pntl.tl/2014/09/24/komisariu-longuinhos-optimista-2015-polisia-prezensa-iha-suku-442/>. Asesu iha loran 15 fulan Juñu tinan 2015.

Reforma ba membru PNTL. Disponivel iha: <http://www.pntl.tl/wp-content/uploads/kalins-pdf/singles/reforma-membru-pntl.pdf>. Asesu iha loran 15 Jullu tinan 2015.

Media Timor Post, 03 Jullu 2015.